

平齋文集

七

平
書
文
集

平齋文集卷第十八

外制二

諸王宮教授蔡仲龍除太常博士制
勅具官某奉常禮樂之司王政繇出朕方起耆儒
爲介卿以備諏訪博士參之宜得賢爾仲龍醞藉
其學詳雅其度楷模宮邸蔚有賢聲端委佩玉据
經以訂損益之文折是非之議蓋裕如也彼度吾
所能行而遷就焉朕安取此可

太社令季晞顏除大理司直制

勅具官某三尺法枉於舞文吏之手朕甚憫焉必
得古之遺直而後可爲邦之司直爾詞藻有華業

履有度所居官惟法守是謹以是議法於廷尉不
撓不折不僭不濫而王道行皇極立矣枉已未有
能直人則孟軻之戒可

敷文閣學士李臺 明堂恩加食邑實

封制

勅朕蒐儀先甲歲祀上辛賦思齊之詩慕親方切
稽我將之頌饗帝尤嚴恍三靈之宴娛道百祿之
來下有懷時彥宜錫神釐具官某學博而識明氣
全而節勁螭頭去國望久鬱於論思豹尾行邊功
獨高於綏定屬大權之親攬務衆正之詳延首告
李泌以束裝欲爲賈生而前席正深樂只宜亟來

思維昔宗祈敷時餒惠駿奔百辟曾齊肱之靡遺
燕衍一賢胡魯膳之未至肆疇米邑仍衍真畚爾
毋謂萬鍾之何加朕未嘗五秉之輕與懋承顯渥
入告嘉猷可

戶部侍郎京湖制置使史嵩之 明堂
恩進封鄞縣開國子加食邑制

勅朕蒐儀先甲歲祀上辛賦思齊之詩慕親方切
稽我將之頌饗帝尤嚴恍三靈之宴娛邁百祿之
來下有嘉邊最宜錫神釐具官某賦穎脫之才抱
輻湊之略從塗融顯侈世業於韋平制閫崇嚴聳
軍聲於羊陸惟四履遐烽之絕警故九筵精意之

潛通禮既底於熙成福寧容於專嚮爵升蒲璧戶
衍畚圭帝命式于九圍朕既荷受球之寵天威不
違咫尺爾毋忘拜胙之恭懋暢英猷對敷景況可
徽猷閣學士新知太平州鄒應龍 明

堂加恩制

勅朕蒐儀先甲展采上辛賦思齊之詩慕親方切
稽我將之頌饗帝尤嚴恍三靈之宴娛邁百祿之
來下有懷夙望宜錫蕃釐具官某學擅倫魁望高
法從居易以俟命初無徇世之心充實而有輝未
究濟時之蘊試望之於馮翊得汲黯於淮陽雖廣
合宮之詢尚遲宣室之見維時熙事丕舉慶條肆

加多邑之榮庸示名藩之寵綏我思成者在於溫
恪介爾景福者由乎靖共懋展英猷對敷休渥可
華文閣學士知慶元府余嶸 明堂恩

進封信安郡開國侯加食邑制

勅朕蒐儀先甲展采上辛賦思齊之詩慕親方切
稽我將之頌饗帝尤嚴恍三靈之宴娛適百祿之
來下有懷宿望宜錫閔休具官某學擅名儒材優
法從長沙之稱吳芮久藉蕃宣東海之得翁歸更
需鎮撫雖緩受釐之訪靡忘籲俊之思迺睠明禋
迄成熙事餽惠下逮於輝胞之賤服膳上親乎族
姓之尊豈繫時髦可後祭澤肆進徹侯之重仍加

采邑之腴綏我思成在於溫恪介爾景福由乎靖
共趣懋展於英猷用對敷於休渥可

楊汝明聶子述 明堂進封加食邑制

勅蒐儀先甲展采上辛賦思齊之詩慕親方切稽
我將之頌饗帝尤嚴恍三靈之宴娛道百祿之來
下有懷宿望宜錫閤休具官某業擅名儒材優法
從騎星辰於奎閣步武寢穹挹風露於珍臺精神
更遠屬改弦而更始每前席之興思迺睠明裡迄
成熙事餽惠下逮乎輝胞之賤賑膳上加乎族姓
之尊豈繫時髦可後祭澤肆肇開於公社仍申衍
於爰田雖舉邦彝寶均帝社予靡忘於寅畏爾毋

替於辰猶可

吏部尚書崔與之除端明殿學士提舉
西京崇福官制

勅節誼天下之大閑而厲其節者在人主德齒天
下之達尊而褒其德者在朝廷朕睠懷東海之濱
夙著南陽之望渴於見晚趣使來思顧抗志之何
高宜疏恩之特異具官某純明而積學靜定而善
謀東撫淮堧制勝紛拏之表西馳蜀道計安震擾
之餘乃 寧考簡知之深予冲人注想之切遲十
年之圭觀游一旦之旌招戔戔之賁丘園儀圖共
政囂囂之樂畎畝懇請辭行屹砥柱於患失之波

歸靈光於戒得之境勉從雅志丕振高風維元祐
諸賢之方來獨范鎮屢召而不至進承明之祕殿
領崇福之殊庭茲復見於耆英宜一循於優禮鳳
翩翩而亦集爰止朕雖阻於儀刑駒皎皎而母有
遐心爾尚殫於訓告可

華文閣待制江西安撫使陳韓除權工
部侍郎兼江西安撫使知隆興府制

勅政令寬猛之中而後有符澤之姦民困飢寒之
迫而後有潢池之盜鉏萌芽則力易圖滋蔓則功
難有嘉討捕之勞庸示褒遷之寵具官某忠以體
國儒而知兵遏淮寇之鴟張威名蚤暢殄閭亮之

蟲起籌略更高綠林動於循梅黑祲被於汀贛跳
梁莫制震蕩靡寧朕合三道而建元戎爾鼓諸將
而鏖劇賊訪鴻鴈於棘矜之下追徃鼙於篁竹之
間左翦右屠而禽其良旣大懲於弗靖下筦上簞
而安斯寢遂咸樂於有生以數年宣力之勤底一
旦成功之偉宜進班於起部仍宅牧於洪都勉爲
朕留益振如虎如貔之氣盡除民蠹永疑買牛買
犢之風可

大理寺丞鄭伯謙差知常德府提舉常

德澧辰沅靖州兵馬制

勅具官某武陵枕重湖帶五溪民夷錯處牧御匪

易必熟知德意者往綏之爾厚而不浮莊而不撓
正于廷尉惻然惟恐一民之冤德意蓋熟之矣出
布藩條旁制四郡奉法循理以康乂民夷俗亦將
聞風而帖服本正則末治也朕方以責實課吏爾
求爲可知嗣對光華之渥可

復中大夫直龍圖閣致仕季衍特贈通

議大夫制

勅具官某天未有久而不定者士君子所以不急
乎人之知而蘄乎天之知也爾公而忠廉而直所
至厥績用茂顧以閑退終人勝天乎朕思起事功
於積弛而才之難九京莫作良深悼歎旣還爾秩

又寓直義圖進兩階以追榮之天者定矣魂而有知歆此愍章可

新知西外宗正事趙彥紆乞休致除直
祕閣宮觀制

勅具官某奔競成俗如水下趨有安於命誼而無
得心吾能尊顯之爾業履平實治行廉靜嘗爲部
刺史通顯矣耻於浚常之求甘從肥遯之樂讀書
求志若將終身朕起之外宗曾莫能奪何卷懷之
深耶寓直木天優游間館身愈退而愈榮可以媿
世之嗜進而驚得者可

王儀特轉朝奉郎致仕制

勅具官某仕者以負外郎致其事則澤及後嗣非
會課應格不可倖得爾疏通而勤敏嘗貳安慶板
築之功居多引疾告老進秩一等不俟積闕遂郎
負外殊恩也歸而教忠尚其無斁可

朝散郎直祕閣李燾特轉朝奉大夫直
華文閣致仕制

勅具官某朕新美政化民獻有十夫予翼方來而
未艾也胡一賢之不憖遺爾蚤從諸老之游熟講
有用之學果達而藝從政何難時未可爲則卷而
懷之時可爲矣則歲不爾與果制於命也耶陟序
正郎陞華奎閣榮其歸老示我惜賢可

歸順人爲防禦使樊辛特補武翼大夫
忠州刺史淮西兵馬副都監制

勅具官某淮右鞠旅汝南歸疆爾有簞食壺漿之
迎我無亡矢遺鏃之費肆嘉知義易授穹階往分
刺郡之榮仍領護戎之寄勉殫忠力用荅殊恩可
李大謙特轉朝議大夫依前直寶章閣
致仕制

勅具官某竭忠盡瘁者人臣之職分榮始厚終者
人君之恩禮爾寬平而栗精練而介更能著聞久
矣輟從郎省司臬左制皇皇臨遣精神猶炯然也
亡幾何遽以謝事告良用閔惻華之奎直佚之祠

館又陞之元士始終恩榮爾尚奚憾可

寶謨閣待制致仕毛憲 明堂加恩制

勅蒐儀先甲展采上辛賦思齊之詩慕親方切稽
我將之頌饗帝尤嚴恍三靈之宴娛適百祿之來
下有懷宿望宜錫蕃釐具官某業擅名儒材優法
從松階凝邃了忘勢利之榮栗里蕭閑自適性真
之樂屬厲精而更始每籲俊之興思迺瞻明裡迄
成熙事餽惠下逮乎輝胞之賤服膳上加乎族姓
之尊豈繫耆英可後祭澤肆衍邑畬之富庸增家
食之華雖舉邦彝寶均帝祉予方篤養老乞言之
意爾毋忘歸美報上之忠可

許應龍除禮部郎中制

勅具官某朕親政以來除南宮郎者再西垣北扉
斧藻玉度皆繇此其選爾紉襲荃蕙之芳步武珩
璜之節璧海瀛山休問藉甚望郎出守挹汗瀾之
澤于潮學益老矣撰儀草奏挈之華峻能以博古
之識昌用世之文其升也孰禦可

司農寺丞傅壘除都官郎中制

勅具官某周司隸總冗辱之役屬秋官漢都官從
事掌中郎官不法屬司隸今元曹憲部挈令隸士
職古而事簡爾儒術通明吏事詳敏累綰郡紱綽
有治行蓋能世其家者涉筆農扈甫謂之來賜墨